

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN SABRI BIN AZIT [JERAJ]

SOALAN

Minta **PERDANA MENTERI** menyatakan apakah langkah-langkah yang berkesan bagi menangani isu keciciran murid KAFA dalam menguasai Al-Quran dan Pendidikan Jawi di seluruh negara.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, Program Kelas al-Quran dan Fardu Ain (KAFA) yang dilaksanakan sejak tahun 1990 adalah suatu program berkonsepkan pengukuhan asas Pendidikan Islam bagi kanak-kanak berumur dari 7 tahun hingga 12 tahun. Program ini menggunakan kurikulum dan buku teks KAFA yang diperakukan oleh JAKIM dengan memberi penekanan kepada kemahiran membaca al-Quran dan asas-asas fardu ain bagi membentuk kemenjadian murid yang cemerlang di dunia dan akhirat.
2. Program KAFA juga merupakan program pengukuhan kepada mata pelajaran Pendidikan Islam yang diajar di sekolah arus perdana dengan waktu Pengajaran dan Pembelajaran (PdP) berjumlah 180 minit seminggu. Melalui Program KAFA, suatu sistem kelas pengajian al-

Quran dan fardu ain yang kemas, seragam dan bersepadu di seluruh Malaysia dapat dilaksanakan.

3. Sehingga kini, murid-murid yang mengikuti Program KAFA dapat menguasai bacaan al-Quran, jawi dan asas-asas fardu ain dengan baik. Ini dibuktikan dengan pencapaian cemerlang Ujian Penilaian kelas KAFA (UPKK) selama tiga tahun berturut-turut bagi subjek amali solat, al-Quran dan jawi & khat seperti berikut:

Tahun / Subjek	2017	2018	2019
Amali Solat	99.9	99.9%	99.9%
Al-Quran	99.7	99.8%	99.86%
Jawi dan Khat	94.7	94.3%	93.2%

4. Perkara ini juga dapat diterjemahkan melalui kebolehan yang ditunjukkan oleh murid-murid yang menyertai program tahunan Ihtifal KAFA Kebangsaan (IKK) anjuran Jabatan Kemajuan Islam Malaysia (JAKIM), yang mana para peserta telah menunjukkan bakat yang sangat membanggakan menerusi acara-acara yang dipertandingkan merangkumi tilawah al-Quran, hafazan al-Quran dan bercerita kisah al-Quran.

5. JAKIM juga dari semasa ke semasa sentiasa melaksanakan penambahbaikan terhadap pelaksanaan Program KAFA bagi memastikan murid-murid tidak tercicir di dalam pendidikan al-Quran, jawi dan asas-asas fardu ain.

Sekian, terima kasih.